

VENDIM
Nr. 241, datë 17.4.2024

PËR DISA NDRYSHIME DHE SHTESA NË VENDIMIN NR. 535, DATË 8.7.2020, TË KËSHILLIT TË MINISTRAVE, “PËR PROCEDURAT, KRITERET DHE RREGULLAT PËR ZBATIMIN E PROGRAMIT TË PUNËVE PUBLIKE NË KOMUNITET”, TË NDRYSHUAR

Në mbështetje të nenit 100 të Kushtetutës dhe të pikës 4, të nenit 11, të ligjit nr. 15/2019, “Për nxitjen e punësimit”, me propozimin e ministrit të Ekonomisë, Kulturës dhe Inovacionit, Këshilli i Ministrave

VENDOSI:

Në vendimin nr. 535, datë 8.7.2020, të Këshillit të Ministrave, “Për procedurat, kriteret dhe rregullat për zbatimin e programit të punëve publike në komunitet”, të ndryshuar, bëhen këto ndryshime dhe shtesa:

I. Në kreun III bëhen ndryshimet e mëposhtme:

1. Fjalja e parë, e pikës 1, ndryshohet, si më poshtë vijon:

“Punëkërkuarët me të drejtë përfitimi janë të gjithë punëkërkuarët e papunë të regjistruar në zyrën e punës, të moshës mbi 21 vjeç, të cilët evidentohen nga ndërveprimi me sistemin tatimor se kanë më shumë se 12 muaj të papunë, pasi të kenë marrë shërbimet e nevojshme të punësimit, të përcaktuara në legjislacionin në fuqi.”.

2. Pika 9 ndryshohet, si më poshtë vijon:

“9. Punëdhënësit kanë të drejtë të aplikojnë për dy grupe maksimumi, me numër jo më të madh se 12 (dymbëdhjetë) punëkërkuar të papunë secili grup.”.

3. Pika 10 ndryshohet, si më poshtë vijon:

“10. Punëdhënësi ka për detyrë të punësojë një mbikëqyrës për çdo grup përfituesish, nga 1 në 24 pjesëmarrës, i cili mund të punojë deri në 40 orë në javë.”.

II. Në kreun IV bëhen këto ndryshime dhe shtesa:

1. Pika 1 ndryshohet, si më poshtë vijon:

“1. Për punëdhënësit përfitues, sipas shkronjave “a”, “b” dhe “c”, të pikës 4, të kreut III, financimi do të kryhet në formë granti, ndërsa për punëdhënësit sipas shkronjës “ç”, të së njëjtës pike, financimi do të kryhet drejtpërdrejt në llogarinë e pjesëmarrësve përfitues në program.”.

2. Në pikën 2 bëhen këto ndryshime:

a) Shkronja “b” ndryshohet, si më poshtë vijon:

“b) Kontributet e detyrueshme shoqërore dhe shëndetësore (pjesën e kontributeve të punëdhënësit dhe të punëmarrësit), të llogaritura në bazë të pagës minimale në shkallë vendi, të ofruara gjatë të gjithë kohëzgjatjes së programit.”.

b) Në shkronjën “ç” bëhen ndryshimet, si më poshtë vijon:

i. Në fjalinë e parë, pas fjalëve “... nën 6 vjeç, ...” shtohen “... personat me aftësi të kufizuara dhe ...”;

ii. Në nënndarjen “i”, fjalët “... 1 600 (një mijë e gjashtëqind) ...” zëvendësohen me “... 1 800 (një mijë e tetëqind) ...”;

iii. Nënndarja “ii” ndryshohet, si më poshtë vijon:

“ii. për prindërit e vetëm ose prindërit e rinj të moshës 25–29 vjeç me fëmijë nën 6 (gjashtë) vjeç të jepet një bonus në vlerën prej 4 000 (katër mijë) lekësh në muaj për kujdesin e çdo fëmije në ngarkim.”;

iv. Në nënndarjen “iii”, të shkronjës “ç”, të pikës 2, pas fjalës “... të kufizuara ...” shtohen fjalët “... , në të cilën përfshihen edhe mjetet ndihmëse në vendin e punës, literaturë/informacion të

përshtatur dhe përkthime për personat me dëmtime shikimi ose dëgjimi, asistent personal në vendin e punës, transport të përshtatur, aksesueshmëri të mjedisit të punës ...”.

3. Në shkronjën “a”, të pikës 3, bëhen këto ndryshime:

a) Në nënndarjen “i”, fjalët “... për grupin nga 1–7 punëkërkues të papunë pjesëmarrës ...” zëvendësohen me “... për grupin nga 1–12 punëkërkues të papunë pjesëmarrës ...”;

b) Në nënndarjen “ii”, fjalët “... për grupin nga 1–14 punëkërkues të papunë pjesëmarrës ...” zëvendësohen me “... për grupin nga 1–24 punëkërkues të papunë pjesëmarrës ...”.

4. Pika 4 ndryshohet, si më poshtë vijon:

“4. Për punëdhënësit përfitues, sipas shkronjave “a”, “b” dhe “c”, të pikës 4, të kreut III, granti financiar do të disbursohet në këste të pagueshme, si më poshtë vijon:

i. Kësti i parë: 30% (tridhjetë për qind) e vlerës totale të grantit të disbursuar me nënshkrimin e marrëveshjes;

ii. Kësti i dytë: 20% (njëzet për qind) e vlerës totale të grantit të disbursuar, pas muajit të dytë të zbatimit të programit;

iii. Kësti i tretë: 20% (njëzet për qind) e vlerës totale të grantit të disbursuar, pas muajit të gjashtë të zbatimit të programit;

iv. Kësti i katërt: 20% (njëzet për qind) e vlerës totale të grantit të disbursuar, pas muajit të nëntë të zbatimit të programit;

v. Kësti i fundit 10% (dhjetë për qind) me përfundimin e kontratës dhe të përmbushjes së të gjithë objektivave në planin individual të trajnimit.

Për punëdhënësit përfitues sipas shkronjës “ç”, të pikës 4, të kreut III, të gjitha shpenzimet do të kryhen në llogarinë personale të përfituesve dhe degën e tatimeve përkatëse çdo muaj.”.

III. Pika 13, e kreut V, shfuqizohet.

IV. Në pikën 5, të kreut VI, fjalët “... 5 (pesë) ...” zëvendësohen me “... 10 (dhjetë) ...”.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama